



Ioannes Taulerus Colonia oriundus sua eruditione & præclara dicendi facundia anno Christi millesimo trecentesimo quinquagesimo in magna authoritate fuit, ita ut eius libri etiamnum in doctorum uirorum manibus terantur. Hic ut liberius studijs uacare posset, ordinem Dominicanorum suscepit, atque Coloniae ad S. Gertrudim concionatorem egit. Postea passim per Germaniam, Argentinæ præsertim ad populum frequentes conciones habuit. Cum autem is uideret gratuitam hominis iustificationem Monachorum questionibus, & humanis traditionibus penitus obscuratam, & quasi extinctam, ipse subinde docuit pios debere, de se omnibusque humanis auxilijs desperantes, in solum Deum suam fiduciam conijcere, ex solo Deo pendere, omniaque ab eo sola fide impetrare. Itaque humanorum operum merita & traditiones uehementer extenuauit, ac omnino omnium superstitionum acerrimus hostis fuit, solam Dei misericordiam diligenter commendans.